

HABRAACA DOORASHOYINKA IYO TALLAABOYINKA LA QAADAYO

Hawsha doorashada ayaa ku bilaabanaysa tababaridda Guddiga Fulinta Doorashooyinka.

Beelaha ayaa Guddiyada Doorashada ee heer federal iyo kuwa heer dawlad goboleed u gudbinaya liisaska ergooyinka wax dooranaya.

Guddigu waxaa ay muddadan dhegaysanayaan haddii ay jiraan cabashooyin la xidhiidha xulista ergooyinka wax dooranaya iyo musharraaxiinta tartamaya.

Guddiga doorashadu waxaa uu qabanayaa codsiyada musharraaxiinta xildhibaannimo.

Guddigu waxaa ay diiwaan gelinayaan warfidiyeenka iyo joojjoogayaasha doorashada la soconaya.

Dowlad goboleedyada ayaa soo gudbinaya liiska xubnaha la xulay ee Aqalka Sare ee Baarlamaanka Federaalka.

Beelaha iyo ergadooda doorashada ayaa soo dhammaystiraya doorashada xubnaha uga mid noqonaya Aqalka Hoose ee Baarlamaanka.

Waxaa la samaynaya hubin iyo sixitaan haddii ay jireen qaladaad farsamo oo dhacay inta lagu jiray xulidda iyo doorashada.

Xubnaha la xulay ee Aqalka Sare iyo kuwa la doortay ee Aqalka Hoose waxaa loo gudbinayaa oo ay tegayaan Muqdisho oo fadhiguudu noqonayo.

Xubnaha Baarlamaanka ayaa loo dhaarinayaa xubnimada baarlamaanka.

Guddoomiyayaasha iyo Guddoomiye kuxigeennada labada aqal ee baarlamaanka; Aqalka Sare iyo Aqalka Hoose ayaa la doorayaa.

Dabadeedna Madaxweynaha Jamhuuriyadda ayaa la dooranayaa.

Muddooyinka u dhexeeya xilliyada ay hawlahani socdaan waxaa dhacaya ololaha doorashooyinka, waxaana musharraaxiinta u tartamaya golayaasha baarlamaanka iyo jagada madaxweynuhuna ku mashquulayaan xodxoda iyo soojiidashada codadka codeeyayaasha. Waxaa ay warfidiyeenkuna ku mashquulsan yihiin tebinta dhacdooyinka la xidhiidha ololaha iyo doorashooyinka ku dhacaya hannaanka dadban, sida tebinta shirarka beelaha iyo khudbadaha musharraaxiintu ay dadka ugu talo galeen iyo warbixinnada ay Guddiyada Doorashadu shaacinayaan.

Guddiga Hirgelinta Doorashooyinka Dadban oo ka kooban laba guddi oo heer federaal iyo heer dawlad goboleed ah ayaa mas'uul ka ah hirgelinta iyo maamulka hannaankan doorasho isla goortaana hubinayana in nidaamka doorashadu u dhaco si xor iyo xalaal ah.